

COMUNICÂT STAMPE

Chest an la grande famee de Societât Filologjiche Furlane si cjatarà tal Friûl culinâr

Domenie ai 7 di Otubar dal 2018 Colorêt al darà acet al 95m Congrès de Societât Filologjiche Furlane

*Al vignarà presentât il Numar Unic "Colorêt" par cure di Carlo Venuti,
cun plui di 850 pagjinis a colôrs*

Domenie ai 7 di Otubar dal 2018 la grande famee de Societât Filologjiche Furlane si cjatarà a **Colorêt** pal **95m Congrès sociâl**.

Pe prime volte tai scuasi cent agns di storie dal Sodalizi, findade tal 1919, la Societât Filologjiche e tocje il lûc simbul, cu la ricostruzion dal cjistiel, de rinassite dopo dal taramot dal 1976. A chest teritori i è stât dedicât un libri une vore prezios, cun passe 850 pagjinis plenis di figuris a colôrs. Metût adun cun savietât dal curadôr **Carlo Venuti**, il libri al racuei in vot sezions i contribûts di sessante autôrs - studiôs di setôr, apassionâts cultôrs ma ancje semplicis personis che a àn volût cjapâ part cul lôr savê ae opare - scrivint di arguments che a tratin di teritori, storie, archeologjie, art, leterature, societât, economie e tradizions di Colorêt, des sôs fraziions e des localitâts.

«Il Numar Unic – al mutive il President de Societât Filologjiche **Federico Vicario** – che al cîr, come simpri, di meti adun e di presentâ storie e culture, int e lûcs, ambient e nature di chest blec di Friûl, al è l'agrât che il nestri Istitût i puarte ae comunitât locâl». Il Sindic **Luca Ovan**, tal ringraziâ la Societât Filologjiche, al pant la sodisfazion di podê «consegnâ chest libri convints di judâ la cognossince e il rispiet dal nestri teritori; l'auguri ch'o fasìn al letôr al è che chestis pagjinis a puedin dismovi un maraveôs sens di apartignince a un lûc cu lis lîdris cussì fondis». Il teritori, di Colorêt cui siei cjistiei, lis sôs aghis, lis sôs glesiis, gleseutis e anconutis (cualchidune disdrumade dal *Orcolât*), al costituìs un tesaur autentic di art, culture e bielege naturâl bon di ispirâ, dilunc dai secui, poetis e scritôrs, parsore di ducj Ermes di Colorêt e Ippolito Nievo.

La zornade dal Congrès, domenie ai 7 di Otubar, si vierzarà aes 9 e mieze a buinore li dal Centri Polifunzionâl di Mels, cul bon acet in musiche de Filarmoniche di Mels direzude dal mestri Mario Castenetto.

Aes 10 si vierzaran i lavôrs: dopo dai salûts dai sorestants a fevelaran **Gian Camillo Custoza**, su *Storie e vicendis dal Cjistiel di Colorêt*, e **Roberto Molinaro** sul *Restaur dal Cjistiel di Colorêt*. E sarà ancje la ocasion par ricuardâ il pitôr **Otto D'Angelo**, mancjât di pôc; si larà indevant cu la presentazion dal Numar Unic *Colorêt*. A misdì e mieç la manifestazion si moverà inte glesie parochiâl dai Ss. Andree e Matie par scoltâ la serenade *Colloredo* di W.A. Mozart, sunade dai

musiciscj de Associazion Mozart Italia sot la direzion dal mestri Stefano Sacher. Daspomisdì, des 4, si podarà partecipâ aes visitis vuidadis al cantîr dal cjistiel di Colorêt (gustâ e visite dome daûr prenotazion al numar 0432 501598). La zornade dal Congrès si sierarà cu la Sante Messe aes 6 e mieze sore sere simpri inte glesie parochiâl; al disarà Messe don Daniele Calligaris, cul acompagnament dai grops corâi di Cjaurià e Colorêt-Lauçane.

Spietant il Congrès, martars ai 2 di Otubar aes 6 sore sere li dal Centri di culture “Papa Luciani” di Cjaurià **Agnul Floramo** al tignarà une conference su Ciro di Pers; lunis ai 22 di Otubar, invece, simpri aes 6 sore sere inte Sale de Comunitât Culinâr dal Cjastiel di Collorêt, **Enos Costantini** al presenterà il Numar Unic *Colorêt* a la comunitât.

Par informazions domandâ ae Segretarie de Societât Filologjiche Furlane di Udin, tel. 0432.501598 int. 1, fax 0432.511766, e-mail: info@filologicafriulana.it.

Udin, ai 26 di Setembar dal 2018

Per informazioni: